

三者為一家陽火數五訣第二百一十二

下愚之生願一請問今天道當具無不有無不包容也天上何觀柯故一時悉欲生而急刑罰乎善哉子之難問得其意吾常甚好子之言子之言常發起吾意使吾道興子向不能難問誰復而難問者乎故天道久斷絕閉而不通天甚疾苦之吾久悒悒欲言無可與言者故天道失其分理久矣歲歲至歲至於今天運生聖人使其語無而盡解除其病者故乃使真人自來與吾相觀乃一得為天具語子難常獨深得天意安坐為子悉陳道之吾欲不言畏天威也故得子問者輒欲言無可匿也真人亦知之邪唯唯然子解解矣今天上所以盡悉欲生長而急害傷者天通常有格三氣其初一者好生名為陽二者好成名為和三者好殺名為陰故天主名生之也人者主養成之成者名為殺殺而藏之天地人三共同功其事更相因緣也無陽不生無

和不成無陰不殺此三者相須為一家共成萬二千物然天道本末中也今者天道初起以來大周復反來屬人屬陽陽好生而惡殺生者須樂乃而合心為一相生而中有殺氣輒傷不能相生成子欲知其信實比若胞中之子不可有小害輒傷死而不復生輒棄一人為是連傷而不止便絕滅無後世矣一家無統絕去矣故尤大急刑罰殺傷也天道同不常如此耳今者大急復更為真人察察分別之使下古人大覺知天道今不欲殺傷談意所以更為真人察察言者俗人隨吾但無事習文辭而作巧語也故更為其陳刑天證今甲子天正也日以冬至初還反本乙丑地正也物以布根丙寅人正也平旦人以初起開門就職此三者俱天地人初生之始物之根本也初生屬陽陽者本天地人元氣故乾坎艮震在東北之面其中和在坎艮之間陰陽合生於中央故凡懷妊者在頭下足上中腹而居微在中和之下陽合者生於最先發去出其形氣投於他方者此主天地人三氣

初生之處物之更始以上下不可有刑殺氣居其中也置其德氣陽氣乃萬物得遂生如有凶氣輒傷故出其刑去之也今者天道大周更始以上下統陽治天治故急斷刑罰也天者稱神陽亦稱神故今天使神治人真人欲知吾書文與天相應不自今以往犯吾書文欲好刑殺者天上亦且考之人亦且更急之神亦且考之天地上亦且異處同謀鬼神不與人同家亦且同謀是天平氣且至也天初氣更始於天土地初氣更始於地下人初氣更始於中央此三氣方俱始生不欲見刑惡凶氣俱欲得見樂氣故自今以往天與地樂斷刑也真人知之乎唯唯愚生暗昧以為天上行疾人為惡而禁刑殺傷也不意乃天地人在懷妊之氣更始之本元也見天師說之甚惶甚懷子知惶且懷可謂覺悟知天道意矣善哉曉事生戒此文慎無斷絕為身害唯唯不敢不敢行去重之凡人學問各為身計務順天道唯唯出此天上禁忌勿藏唯唯請問天道何故正以今為大周為元初乃更

大數考正文哉善乎子之難問也大得天心
 意然今者五陽之上長也五火之始也火之
 最上者上為天為日月之色者火赤與天同
 色天之色赤火亦赤者逆稱神天與神者
 常昌得凡事之元是故十一月為天正天上
 亦然故其物氣赤赤者日始還反其初九氣
 屬甲子為六甲長上首也甲者為精為凡事
 之心故甲最先出於子故上出為心星故火
 之精神為人心也人心之為神聖神聖人心
 最尊真善故神聖人心乃能造作凡事為其
 初元首故神聖之法乃一從心起無不解說
 故赤之感者為天為日為心天與日與心常
 明無不而照察故自今以往行此道者盡邪
 之屬悉絕去矣夫陽之生者於幽冥之中是
 故陽氣起於北而出於東盛於南而衰消於
 西天之為法如此矣善哉願聞今陽之生者
 何故正於幽冥中乎夫生者皆反其本陰陽
 相與合乃能生故且生者悉復其初始也天
 地未分初起之時乃無有上下日月三光上
 下洞冥洞冥無有分理雖無分理其中內自

有上下左右表裏陰陽俱相持而不分別
 若陰陽相持始共生其施洞洞亦不分別已
 生出然後頭足具何知陰陽之初生之始如
 是矣故人今將變化而施生者悉往就幽冥
 闡處天使不忘其本也人初受天地之法是
 其先也故天使其不忘也善哉善哉見皇天
 師言乃知分理也子可謂易示曉矣請問陽
 與火何獨伍乎行氣者各自有伍非獨火也
 金火最為伍赤帝之長故天策書非云邪丙
 子丁巳為祖始始者先也首也故書言祖始
 也萬事之始從赤心起心者洞照知事陽始
 於陰中亦洞照故水者外暗內明而洞照也
 中有陽精也故陽始起於北而陰始起於南
 十一月地下溫五月地下寒今陰陽始起何
 不於天上而正於地中乎善哉子之難問也
 然地為母父施於母故於陰中也其施陽精
 同始發於天耳陽者其化始氣也微難觀入
 陰中成形乃著可見故記其陰中不記其陽
 也今天雨雪同是其施化之道見可觀而言
 陽施精微不可觀乎善哉子之言也難得其

意欲為真人分別說之恐天道大形見故不
 為子說也然恐真人心恨夫為人師為人上
 者難請安坐為子微說之天雨雪造將為之
 時呼吸但氣耳陰陽交相得乃施可觀於此
 之時天氣下地氣上合其施故雨雪有形而
 可見也請問今或有山潰雲上皆可觀而言
 不可觀何也欲不問苦悵悵今故具問之為
 弟子不謙不也不問無以得知之致當問之
 無所疑也諾為子微說之不可窮極然雲雨
 潰山此者陰之盛怒而不自忍傷陽化凶事
 也非善變也有傷於化之道陰之失也陰之
 傷也真人勿復窮問天道亦不可察察盡言
 也子自思其意唯唯行去
 道祐三人訣第二百一十三
 真人再拜謹問天師道太平氣至誰者當宜
 道哉誰者不宜道乎善哉子問事也夫道與
 人比若風雨為者則善不為則已好為者則
 其入也不好為者即非其入也為者不用力
 易開通者即是其入也不開不通終日無成
 功即非其入也為之即言不為則凶是其入

也不為之其人自吉善無所疾苦己為之後反有所疾苦即非其人也又凡人自養不可不詳察也夫道者乃正人之符也疾病鬼物者過邪惡之階路也賊殺良民之盜賊也或見人且入正道因反怒人與人爭鬪於人為正道反凶不為善反安隱於等之間不可不謹詳自精者得道則吉失道則凶也死生之命不可自易而不謹詳也善哉善哉愚生已解矣然其人既問疑事且告真人天要語吾道之所以而長久養者人而樂道樂德樂仁忽於凡事獨貪生耳道正長於養守此二人也過此而下者吾道不而長久養也何哉夫人道乃無不覆蓋何故獨宥此三人不宥餘哉然善哉子之難問也得其意夫大道之出也人皆蒙之恩乃及草木莫不化為善皆得其所俱而各竟其天年夫無道德不仁不可久養也何哉然但以其不好道德仁也夫好道德仁何故獨可久養哉願聞其意然子曉事生哉其問事絕訣也詳聽為子分別言其意唯唯然是好道德仁此三人皆有三統之

命樂好道者命屬天樂好德畜養者命屬地樂好仁者命屬人此三人者應陰陽中和之統皆有錄籍故天上諸神言吾文能養之也行不若此亦無錄籍故吾文不能久養之也今太平氣至無姦私故不而久養姦惡之人也不如往者內亂之時能包養惡人也願聞其竟說然姦邪惡氣出活者反能久養姦惡之人而不能久養善人者是其衆害多善者少也比猶若大寒至而熱氣來也今正氣至乃不能久養姦惡之人比若陽氣至而陰氣消亡也夫太陽上赤氣至乃火之玉精也火之王者乃光上為日日者乃照察姦惡人故言不得為非故不容惡人也又道者主生德者主養仁者主用心故愛春即生夏者即養人則用心治理養長萬物故太陽所生養長用心最勞苦此之謂也善哉善哉愚生重聞命乎然安坐為子更有所脩解唯唯一事學道而大度者在天中度者在神靈小度者在人也二事學德而大度者在天中度者在神靈小度者在人也三事學仁而大度者在

天中度者在神靈小度者在人也四事學官而大度者在天中度者在神靈小度者在人也五者好畜聚財業大多者在天中多者在神靈小多者在人也然此五事大度中度小度一由力之歸命於天歸德於地歸仁於人守此三事學身以賢心善意思之惟之身延可成積之聚之神且自生守之養之道且自成樂之好之身且自與天道無親無昧付歸善人是故天自力行道日一周所以一周者凡物之生悉法六甲五行四時而生一氣不至物有不具則其生不足不調矣為人君上父母而不調大過也故天日一周自臨行之也所以自臨行之者假令子水也但有水氣未周五行氣不足四時氣不周故為行而臨之甲加其上有木行有春氣丙加其上有火行有夏氣戊加其上有土行有四季中央之氣庚加其上有金行有秋氣壬加其上有水行有冬氣五身已周四氣已著乃凡物得生也天地施化得均專卑大小皆如一乃無爭訟者故可為人君父母也夫人為道德仁者

雷法此乃得天意不可自輕易而妄行也天道為法如此而况人乎故上士法天其道乎中士法地其德乎下士法人其仁乎過此而下者不屬於人故與禽獸草木同乎無常命真人得吾文書自深思其要意緣而無善與天相得同事也與吾文反者乃天地之怨也吾亦不耐也吾文書所惡正是也真人慎之以付上士歸縣官示凡人自今以往天與古異善哉善哉

右分別太平文出所宜所不宜訣

太平經卷之一百一十九

太平經復文序

上士

皇天金闕後聖太平帝君太極官之高帝也地上之齋生而靈異早悟大道勲業著於丹臺位號編於太極上清錫命總統群真封掌先民山川河海八極九域莫不盡關於帝君而受事焉君有太師上相上宰上傳公卿侯伯皆上真案屬垂謨作典預令下教故作太平復文先傳上相青童君傳上宰西城王君王君傳弟子帛和帛和傳弟子千吉千君初得惡疾殆將不救詣帛和求醫帛和告曰吾傳汝太平本文可因易為一百七十卷編成三百六十章普傳於天下授有德之君致太平不但疾愈而度世千君授教究極精義敷演成教當東漢末中國喪亂齋經南遊具趙居越東一百三十里山名太平溪曰千溪遺跡見存士庶翕然歸心時孫策初定江南方正霸業策左右咸奉千君策以為搖動人心因証以罪而繫之策告曰天久旱得雨當免條忽之間陰雲四合風雨暴至策愈惡之今斬首懸諸市門一旦暴風至而失尸所在

君因更名字遂入蜀去策覽鏡見君首在鏡中因發面瘡而卒時咸以戮辱神仙致斯早殞故孫權立益信奉道術師葛仙公介先生亦遊其庭南朝喪亂太平不復行暨梁陶先生弟子桓法聞闡東陽烏傷縣人於溪谷間得太平本文因取歸而疾作先生曰太平教未當行汝強取之故疾也令却送本處未幾疾愈至陳宣帝時海隅山漁人得素書有光燭天宣帝勅道士周智響往祝請因得此文丹書煥然周智響善於太平經義常自講習時號太平法師宣帝略知經旨而不能行陳氏五主宣帝最賢爰自南朝湮沒中國復興法教雖存罕有行者綿歷年代斯文不泯繕寫寶持將俟賢哲士辰之運迎聖君下降觀太平至理仙侯在事天民受賜復絕古斯文之功彰也凡四部九十五章二十一章是千君八字皆太平本文其三百六十二章是千君從本文中演出並行於世以復相輔成教而傳受焉故不謬也